

Laišks i dongo

Modu jungi krauji rīšis,
Modu jungi žuvēis zodiaka žēnkls,
Modu jungi bēndri veida bruožā.
Tik aš vēskon sopratau par vėlā.

Tava ronkeli vedi moni par gīvenima,
Tava akelis līdieji mona žingsnius,
Tava širdeli linkieji mon tik gera,
Tava kuojelis skobieji gīvenima keliu.

Aš prēsēmenu, kāp modu stoviejuom
Ont lipteli pri maža prūdeli.
Vedo skaičiavuom tas mažas žuvelis,
Katrūs skubieji gīventi ē džiaugtēis.

Toukart bovau aš maža mergeli –
Toukart reikieji tvėrtuos ronkelis,
Katra sauguotu muni nu pėkta
Ē līdietu i platu gīvenima.

Čiesas biega prabiega tēp mitrē –
Ē dukreli užauga kap lėipa,
Ē ateji tas čiesas tēp mitrē,
Ka laikau dabā tavouji ronka.

Ronka brongi, katra līdieji
Par gīvenima vietras ē ciongus,
Ēšvaguota gīvenima lėniju
Ē pavargusi nu omžina skubiejima.

Čiesas pakeit na tik veida bruožus,
Plaukū srougas pasipouš baltā.
Ons tēp skob, ka naspiejem sostuoti,
Pasidžiaugti vēins kitu dažnā.

Čiesas atneš i vargus i žemi,
Katrėi pabiegti nalėd mums dažnā.
Atsidūriem ē vedu tarp žmuoniūm,
Katrū tēklus tik vēins – gīventi!

Tava slabna ronkeli vis tēisās,
Jau žuodieli tau sunku rokoutė.
To vis ruodā i gražiouji akvariuma,
Katram i plaukiuo žovelis mitrē.

Tėik nuoriejau suprasti tus žēnkls,
Tėik nuoriejau rokoutėis, kap seniau.
Mon nē mintėis nakėla i galva,
Ka dėinelis jau suskaičioutas.

Gal nuoriejē priminti tou čiesa,
Ka stuoviejuom ont maža liepteli.
Ka skaičiavuom tas mažas žuvelis,
Ē tas čiesās baveik nakošieji.

Ka tavuoji šērdeli sostaiki,
Ka užgesa akeliu švēiseli,
Aš suprasti pradiejau tus ženklus,
Ka kikvēins uns jungi modu.

Modu jungi krauji rīšīs,
Modu jungi žuvēis zodiaka ženklis,
Modu jungi bēndri veida bruožā.
Tik aš vēskon sopratau par vėlā.

Ta sobroskem sakīti „mīlu“,
Kol vondinie žīd lelējis.
Napavēloukem prisiglausti, apkabinti,
Nas žēima mitrē užkluo ledu.